

Morning Dogri (NSD) Bulletin 08-10-2023

आकाशवाणी

1. भारत सरकार दी अंतर मंत्रालय समिति हाड़ें दी मारै हेठ आए दे सिक्किम दा दौरा लाइयै उत्थें होए दे नुक्सान ते सहायता उपलब्ध करोआने दे कम्में दा जायजा लैग।
2. जीएसटी परिषद नै आक्खेआ ऐ जे करदाता पिछले माली ब'रे लेई जारी मंग आदेशें दे सरबंधें च अपील 31 जनवरी 2024 तगर दाखल करी सकदे न।
3. भारती वायु सेना अपनी 91वीं ब'रेगंड पर अज्ज अपने नमें झंडे दा अनावरण करोग।
4. इजराईल नै हमास दे हमलें दे परते च आपरेशन स्वार्ड ऑफ आयरन शुरू कीता ऐ। प्रधानमंत्री नरेन्द्र मोदी होरें आक्खेआ ऐ जे भारत बिपदा दी इस घड़ी च इजराईल कन्नै पूरी इकजुटता नै खेड़ोते दा ऐ।
5. आईसीसी विश्व कप 2023 च अज्ज भारत अपना पैहला मकाबले आस्ट्रेलिया खिलाफ खेड़डोग।

<><><><><><>

Sikkim

सिक्किम च चानचक्क आए दे हाड़ें च मरने आलें दी गिनतरी बधियै 30 होई गई ऐ, जिंदे च भारतीय फौज दे 9 जुआन बी शामिल न। राज्य आपदा प्रबंधन प्राधिकरण एसडीएमए नै तस्दीक कीती ऐ जे 4 अक्टूबर गी तीसता नदी च चानचक्क आए दे हाड़ परैंत 81 जनें अजें बी लापता न। कुल 1320 घरें गी मता नुक्सान पुज्जा ऐ। अजें तोड़ी 2563 लोकें गी बचाया जाई चुके दा ऐ ते तकरीबन 7025 लोकें 30 राहत शिविरें च आसरमा लैते दा ऐ। चानचक्क आए दे हाड़ें कारण 13 पुल बी रूड़ी गे न। गृह राज्यमंत्री अजय कुमार मिश्रा होरें दस्सेआ जे केन्द्र सरकारै इक अंतर मंत्रालयी कमेटी खड़ेरी ऐ जिंदे च 5 मंत्रालय कृषि, परिवहन जरनैली शिड़क, जल शक्ति, ऊर्जा ते वित्त दे सीनियर अफसर शामिल न। कमेटी जमीनी हालात दा जायजा लैने, नुक्सान दा अंदाजा लाने ते होर मदाद देने दे मकसद कन्नै अज्ज 8 अक्टूबर थमां सिक्किम दा दौरा लाग। श्री मिश्रा होरें दस्सेआ जे केन्द्र सरकारै राज्य गी तुरत बचाह राहत ते बहाली करने दे समर्थ बनाने आस्तै 2023-24 आस्तै एनडीआरएफ ते एसडीआरएफ लेई तैह बजट गी अग्रिम मंजूरी देई दित्ती ऐ। उनें भरोसा दोआया जे केन्द्र सरकार सिक्किम च हालात गी तौले बेहतर बनाने च कोई कसर बाकी नैई रखोग।

<><><><><><>

GST

जीएसटी परिषद दी 52मीं बैठक कल 7 अक्टूबर गी इक माफी योजना लेइयै आई, जेहदे च टैक्स देने आलें गी मार्च 2023 तगर टैक्स मैहकमे दे अफसरें आस्सेआ जारी डिमांड आर्डर यानि मंग दे हुक्म खिलाफ अपील दायर करने लेई 31 जनवरी 2024 तगर दा समां दित्ता गेआ ऐ। जीएसटी दे कनून मताबक इक जना इक याचिका दायर करी सकदा ऐ। इस गैह कन्नै उनें टैक्स देने आलें गी राहत थहोई ऐ जेहडे पैहले तैह समें दरान अपील दायर नैई करी सके हे। परिषद नै अपनी बैठक च जीएसटी पंजीकृत बपारिएं गी टैक्स मंग दे 12.5 प्रतिशत दी पैहलकी जमा रकम कन्नै अपील दायर करने दा समां दित्ता ऐ जेहड़ी मजूदा

समें च 10 फीसद ऐ। जीएसटी परिषद नै बपारिएं गी सहूलत पजाने दे मकसद कन्नै जीएसटी नियमें च किश तरमीम कीती ऐ।

<><><><><><>

Air Force

भारतीय ब्हाई सेना अज्ज अपने 91में स्थापन दिवस दे मौके उत्तर प्रदेश दे प्रयागराज च अपने नमें प्रतीक चिन्ह गी लोकें दे नमित करोग। हवाई सेना प्रमुख एयर चीफ मार्शल वी. आर.चौधरी प्रयागराज दे बामरौली च हवाई सेना दिवस परेड दरान इस नमें प्रतीक चिन्ह दा अनावरण करगंन। इस मौके भारतीय वायु सेना संगम इलाके च एयर शो दा बी सरिस्ता करोग। आकाशवणी संवाददाता नै खबर दित्ती ऐ जे हवाई सेना दा नमां प्रतीक चिन्ह भारतीय वायु सेना दे मुल्लें गी बेहतर तौरा पर दस्सोग। एह हवाई सेना दे झंडे च उपरली बक्खी खब्बे पासै लब्भोग। एह्दे कन्नै गै पराना झंडा तवारी लैता जाग ते इसी हवाई सेना दे नमैशघर च प्रदर्शनी दे तौरा पर शामिल कीता जाग। इस मौके उत्तर प्रदेश दियां गवर्नर आनंदी बेन पटेल मुख परौहने दे तौरा पर मजूद रौंहगन। राज्य दे औद्योगिक विकास मंत्री नंद गोपाल गुप्ता नंदी, वायु सेना प्रमुख एयर चीफ मार्शल वी.आर.चौधरी, चीफ ऑफ डिफेंस स्टाफ जनरल अनिल चौहान, मध्य वायु कमान दे जनरल आफीसर इन कमांड, एयर मार्शल आर.जी.के.कपूर ते होर दुए मन्ने परमन्ने दे लोक कार्यक्रम दी शोभा बदांगन। हवाई प्रदर्शन च 10 एयर बेस थमां राफेल फाइटर जेट ते हैलीकाप्टर सनें 100 शा बद्ध लड़ाकू ते दुए आम जहाज भारतीय वायु सेना दी ताकत दा प्रदर्शन करगंन। प्रदर्शन च मिग-21 गी रस्मी विदाई दित्ती जाग। संगम क्षेत्र ते ओह्दे आले दुआले दे इलाकें च इस नजारे गी 5 लक्ख शा मते लोकें पाससेआ दिक्खने दी मेद ऐ।

<><><><><><>

Tanjania President

तंजानिया दी राष्ट्रपति सामिया सुलुह हसन अज्जे थमां भारत दे दौरे पर आवा करदियां न। उंदा दौरा मंगलवार 10 अक्तूबर तगर जारी रौंहग। ओह् नमीं दिल्ली च राष्ट्रपति द्रौपदी मुर्मू हुंदे कन्नै मलाटी लाने दे इलावा होरनें मन्ने परमन्ने दे लोकें कन्नै बी मिलगंन। सामिया हुंदा राष्ट्रपति भवन च रस्मी तौरा पर सुआगत कीता जाग। उंदा प्रधानमंत्री नरेन्द्र मोदी हुंदे कन्नै दपक्खी गल्लबात दा बी कार्यक्रम ऐ। उनें मंगलवार 10 तरीक गी नमीं दिल्ली च इक बपार ते रास पूंजी लाने सरबंधी कार्यक्रम च शिरकत करगंन। एह दौरा भारत ते तंजानिया बश्कार ऐतिहासक ते मित्री आले सरबंधें गी होर तगड़ा बनाग।

<><><><><><>

Ierail-Hamas

हमास दे हमलें दे परते च इजराइली फौज नै आपरेशन स्वार्ड ऑफ आयरन शुरू कीता ऐ। इजराइल च हमास दे हमलें च मरने आलें दी गिनतरी बधियै 300 दे पार पुज्जी गई ऐ ते डेढ ज्हार कोला बद्ध लोक जख्मी न। इजराइली फौजें गाजा पट्टी च हमास लड़ाकें दे 17 ठकानें ते चार आपरेशनल कमान केन्द्रें गी नशाना बनाया ऐ जेह्दे च 230 शा मते लोक मारे गे न। इजराइल दे प्रधानमंत्री बेन्यामिन नेतन्याहु होरें हमास दी सख्त निंदेआ करदे होई जंग दा ऐलान कीता ऐ। खबरें मूजब दुनिया भरै दे प्रमुख नेताएं हमास आतंकवादिएं आस्सेआ इजराइल पर हमले दी निंदेआ कीती ऐ। प्रधानमंत्री नरेन्द्र मोदी होरें इजराइल दे प्रति इकजुटता दर्शादे होई आक्खेआ ऐ जे बिपदा दी इस घड़ी च भारत दी संवेदना, इजराइल दे

बेदोसैं पीड़ितें ते उंदे परोआरें कन्नै ऐ। अमरीका दे राष्ट्रपति जो बाइडेन होरें आक्खेआ ऐ जे आतंकवाद गी कुसै बी सूरतै च जायज करार नेई दित्ता जाई सकदा। उनें इब्बी आक्खेआ जे अमरीका इजराइल दी सरकार ते जनता दे कन्नै ऐ। तोआई ब्रिटेन दे प्रधानमंत्री ऋषि सुनक होरें हमास दे हमलें पर हरानगी जताई ऐ। हमास दे हमले दे बाद फलस्तीन च भारत दे प्रतिनिधि दफ्तरै रामल्ला च रवै करदे भारती नागरिकें गी आपात स्थिति च उंदे नै संपर्क करने लेई आक्खेआ ऐ। एह्दे लेई हैल्पलाइन नंबर-0592-916418 ते वट्स ऐप नंगर 970-59291641 बी जारी कीता गेआ ऐ। एह्दे शा पैहले जंदे शनिवारें हमास नै गाजा थमां इजराइल च केई राकेट दागे जेह्ड़े केई शैहरें च डिगो।

<><><><><><>

Delhi Police

दिल्ली पुलसै राष्ट्री राजधानी दे सरिता बिहार इलाके थ्रमां आतंकी सरगना अर्श डल्ला-सुक्खा दुनेका गिरोह दे इक सदस्य हरजीत सिंह उर्फ हेरी मौ गी गिरफ्तार कीता ऐ। हरजीत सिंह दी हत्या दे चार मामलें च तलाश ही। पुलसा दे इक आला अधिकारी मूजब हरजीत सिंह इस गिरोह दा इलाकाई संचालक ऐ। ओह पंजाब दे बठिंडा जिले दा बसनीक ऐ ते बड़े दिनें थमां गिरफ्तारी शा बचा करदा हा। इससै गिरोह दे इक होर सदस्य हैरी राजपुरा गी इक म्हीने पैहले गिरफ्तार कीता गेआ हा।

<><><><><><>

Afghanistan

अफगानिस्तान च आए दे 6.3 तीव्रता दे ताकतवर भूचाल कन्नै घट्टोघट्ट 120 लोक मारे गे न ते 1 ज्हार शा मते जख्मी न। भूचाल दा केन्द्र हेरात शैहर थमां 40 किलोमीटर उत्तर पच्छम च हा जित्थें केई इमारतां ढेई गेइयां ते सैकड़ें बद्धे लोक उंदे मलबे हेठ दबोई गे। हेरात ईरान दी सरहद थमां कोई 120 किलोमीटर पूर्व च ऐ ते इसी अफगानिस्तान दी सांस्कृति राजधानी मन्नेआ जंदा ऐ।

<><><><><><>

Ayush

केन्द्री आयूष मंत्री सरबानंद सोनोवाल होरें असम च 6 नमें आयूष अस्पताल बनाने दा ऐलान कीता ऐ। कल माजुली च 50एं बिस्तरें आले आयूष अस्पताल दा उदघाटन करदे होई श्री सोनोवाल होरें आक्खेआ जे असम च 289 आयूष सेहत ते आरोग्य केन्द्रें दा संचालन कीता जा करदा ऐ जदके राज्य च ऐसे 200 केन्द्र तौले गै शुरू कीते जांगन। उनें एलान कीता जे असम दे सब्बनें जिलें च कुल 100 आयूष औषधालय स्थापत कीते जांगन।

<><><><><><>

Cricket

क्रिकेट विश्व कप मकाबले च अज्ज भारतीय टीम अपने अभियान दी शुरूआत आस्ट्रेलिया खलाफ मैच खेडिड्यै करोग। एह मैच एम.ए.चिदंबरम स्टेडियम च खेड्डेआ जाग। एह्दे थमां पैहले कल खेड्डे गेदे मैच च दक्खन अफ्रीका नै श्रीलंका गी 102 रंजें कन्नै हराई दित्ता। पैहले बल्लेबाजी करदे होई दक्खन अफ्रीका नै तैह 50 ओवरें च 5 विकेटें दे नुकसान पर 428

रजे दा विशाल स्कारे बनाया। लक्ष्य दा पीछा करदे होई श्रीलंका दे खडारी चैरिथ असलंका, कुसल मैडिस ते कप्तान दासगुन शनाका नै बेहतर पारियां पर ओह टीमै गी जितत नेइं दोआई सकै। कल खेड्डे गेदे इक होर मैच च बंगलादेश नै अफगानिस्तान गी 6 विकटें कन्ने हराई दित्ता।

<><><><><><>